



## **KATEKEZE IKUS BENTO XVI NIAN**

**Prasa S. Pedro**

**Kuarta, 27 Fevereiru 2013**

Veneradu maun-alin sira iha Episkopadu no Saserdósiu!

Ilustre Autoridade sira!

Maun-alin doben sira!

Ha'u agradese imi tanba mai ho número boot hanesan ne'e iha ha'u-nia Audiência Jerál ikus.

Obrigadu husi fuan! Ha'u sente kona-tebes ha'u-nia fuan! No ha'u haree Kreda moris hela! No ha'u hanoin katak ita tenke dehan mós obrigadu ba Kriadór ba tempu furak ne'ebé nia haraik mai ita maski sei iha invernu hela.

Hanesan apóstolu Paulo iha testu bíbliku me'ebé ita foin rona, ha'u mós sente iha ha'u nia fuan devér atu agradese liulu Maromak, ne'ebé gia no halo buras Kreda, ne'ebé kuda ninia Liafuan nune'e haburas ninia Povu nia fiar. Iha momentu ne'e ha'u-nia espíritu sai boot atu hakohak Kreda tomak iha mundu; no ha'u agradese Maromak ba "notísia" sira ne'ebé iha tinan sira ministériu petrinu nian ha'u bele simu kona'ba fiar iha Na'i Jezús Kristu, no ba karidade ne'ebé tebes duni sirkula iha Kreda nia Isin no halo nia moris iha domin, no ba esperansa ne'ebé loke ita no orienta ita ba moris iha plenitude, iha dalan ba rai-inan Lalehan.

Ha'u sente lori imi hotu iha orasaun, presente ida Maromak nian, iha-ne'ebé ha'u simu iha enkontru ida-idak, viajen ida-idak, vizita pastorál ida-idak. Buat hotu no imi hotu ha'u simu iha orasaun atu saran ba Na'i: atu ita iha konxiénsia tomak kona-ba ninia vontade, ho matenek no inteligénsia espírituál, no atu ita nia hahalok monu loloos ba Nia, ba nia domin, hodi fó fuan hahalok di'ak nian (kf Col 1,9-10).

Iha momentu ida-ne'e, ha'u iha konfiansa boot, tanba ha'u hatene, ita hotu hatene, katak Liafuan lialoos Evanjellu nian mak Kreda nia kbiit, ninia moris. Evanjellu purifika no hafoun, lori rezultadu sira, iha comunidade fiar-nain sira-nian ne'ebé rona nia no simu Maromak nia grasa iha lialoos no iha karidade. Ne'e mak ha'u-nia konfiansa, ne'e mak ha'u-nia ksolok.

Bainhira, iha 19 Abríl kuaze tinan ualu liubá, ha'u aseita asume minsitériu petrinu, ha'u iha serteza metin ne'ebé akompañia nafatin ha'u: serteza kona-ba Kreda nia moris, kona-ba Maromka nia Liafuan. Iha momentu ne'ebá, hanesan ha'u esprime dala barak ona, liafuan ne'ebé nalian iha ha'u-

nia fuan mak: Na'i, tansá Ita husu ida-ne'e mai ha'u no sá mak Ita husu mai ha'u? Buat ne'ebé Ita tau iha ha'u-nia kabaas mak naha-todan boot, maibé se Ita husu ha'u, tuir Ita-nia liafuan ha'u sei soe dai, fiar katak Ita sei gia ha'u, maski ho ha'u-nia frakeza sira hotu. No tinan ualu liutiha ha'u bele dehan katak Na'i gia ha'u, Nia besik Ha'u, ha'u bele sente Ninia prezensa. Ne'e parte ida Kreda nia dalan nian ne'ebé soi momentu ksolok no naroman nian, maibé mós momentu la fasil; ha'u sente hanesan S. Pedro ho Apóstolu sira iha roo laran iha tasi Galileia nian: Na'i haraik mai ami laron barak holormatan no anin maus, laron sira iha-ne'ebé hetan ikan barak; iha mós momentu iha-ne'ebé bee sira baku maka'as no anin boot, hanesan iha istória tomak Kreda nian, no Na'i hanesan toba hela. Maibé ha'u konxiente nafatin katak Na'i horik iha roo ne'e no ha'u nafatin konxiente katak roo Kreda nian la'ós ha'u-nian, la'ós ita-nian, maibé Ninian. No Na'i la husik nia mout; Nia mak lori nia, konserteza liuhusi ema sira ne'ebé nia hili mós, tanba nune'e mak Nia hakarak. Ida-ne'e mak serteza ida uluk no agora, no la iha buat ida bele halakon nia. No tanba ne'e mak ohin ha'u-nia fuan nakonu ho agradesimentu ba Maromak tanba Nia nunka husik atu nia Kreda no ha'u mós la simu ninia konsolasaun, ninia naroman, ninia domin.

Ita moris iha Tinan Fiar nian, ne'ebé ha'u rasik hakarak atu habiit ita-nia fiar iha Maromak iha kontestu ida ne'ebé parese tau Nia iha fatin daruak. Ha'u hakarak konvida imi hotu atu hafoun konfiansa metin iha Na'i, atu saran ita-nia an hanesan labarik sira iha Maromak nia liman, ho serteza katak liman sira ne'e tane nafatin ita no fó mai ita possibilidade atu kontinua la'o ba oin laron ba laron, maski iha kolen. Ha'u hakarak atu imi ida-idak sente katak Maromak ne'ebé saran nia Oan mak ita no hatudu nia domin laho limite hadomi ita. Ha'u hakarak atu imi ida-idak sente ksolok tanba sai ema sarani. Iha orasaun furak ida atu harohan dadeer-dadeer hateten: "Ha'u-nia Maromak, ha'u adora Ita-Boot no ha'u hadomi Ita-Boot ho ha'u-nia laran tomak. Ha'u agrade se Ita-Boot tanba Ita-Boot halo ha'u moris, halo ha'u sai sarani...". Loos, ita haksolok ba don fiar nian; ne'e mak soin presiozu liu, ne'ebé ema ida labele hasai husi ita! Ita agrade se Na'i ba buat ne'e loroloron, ho orasaun no ho moris sarani koerente. Maromak hadomi ita, maibé hein atu ita mós hadomi Nia!

Maibé la'ós de'it ba Maromak mak ha'u hakarak agrade se iha momentu ida-ne'e. Papa ida nunka mesak atu gia Pedro nia roo, maski ida-ne'e mak ninia responsabilidade uluk liu. Ha'u nunka sente mesak atu lori ksolok no naha-todan ministériu petrinu nian; Na'i tau ema barak ne'ebé, ho laranluak no domin ba Maromak no ba Kreda, tulun ha'u no besik ba ha'u. Uluknanai imi, Kardeál doben sira: imi-nia matenek, imi-nia konsellu sira, imi-nia amizade presiozu tebes ba ha'u; ha'u-nia kolaboradór sira, hahú husi, ha'u-nia Sekretáriu de Estadu ne'ebé akompaña ha'u ho fidelidade iha tinan hirak ne'e; Sekretaria Estadu nian no Kúria Romana tomak, nune'e mós sira hotu ne'ebé, iha setór oioin, halo servisu ba Santa Sé: sira barak ne'ebé la hatudu sai sira-nia oin, servisu iha kotuk, maibé iha sira-nia silénsiu, iha sira-nia dedikasaun loroloron, iha espíritu fiar no haraik-an nian sai apoiu seguru no konfiansa nian mai ha'u. Hanoin espesial ida ba Kreda Roma nian, ha'u-nia Dioseze! Ha'u la bele haluha ha'u-nia maun-alin sira iha Episkopadu no Saserdósiu, ema konsagradu/a sira no Maromak nia Povu tomak: iha vizita pastorál sira, iha enkontru sira, iha audiénsia sira, iha viajen sira, ha'u sempre haree atensaun boot no domin kle'an; maibé ha'u mós hadomi imi hotu no imi ida-idak, laho distinsaun, ho karidade pastorál katak ho fuan Bibi-Atan nian, liuliu Bispu Roma nian, Susesór Apóstolu Pedro nian. Laron ba laron ha'u lori imi ida-idak iha orasaun, ho fuan aman nian.

Ha'u hakarak atu ha'u-nia saudasaun no ha'u-nia agradesimentu to'o ba ema hotu: Papa ida nia fuan loke luan ba mundu tomak. No ha'u hakarak atu hato'o ha'u-nia gratidaun ba Korpu

diplomátiku iha Santa Sé, ne'ebé halo atu família boot Nasaun sira nian sai presente. Iha ne'e ha'u hanoin mós sira hotu ne'ebé serbisu ba komunikasaun di'ak, no ba sira ha'u agradese ba sira-nia servisu importante.

Iha pontu ne'e ha'u hakarak agradese tebes duni ho laran ema lubun boot iha mundu tomak, ne'ebé iha semana ikus sira-ne'e haruka mai ha'u sinál komovente atensaun nian, amizade no orasaun nian. Loos, Papa la mesak, agora nia koko dala ida tan ho modu boot tebes ne'ebé kona duni fuan. Papa pertense ba ema hotu no ema barak sente besik liu ba nia. Loos katak ha'u simu surat husi boot sira mundu nian – Xefe Estadu sira-nian, Líder relijiozu sira, representante mundu kultura nian, nst. Maibé ha'u simu surat barak husi ema simples sira ne'ebé hakerek simplesmente husi fuan no halo ha'u sente sira-nia afetu, ne'ebé mai husi hela ho Kristu Jezús, iha Kreda. Ema sira-ne'e la hakerek hanesan porezemlu, ba liurai ida ka ba ema ida ne'ebé la koñese. Sira hakerek hanesan maun-alin no feton sira ka nu'udar oan mane no oan feto sira, ho sentidu ligasaun familiár domin boot nian. Iha ne'e ita bele kona ho liman katak sá Kreda – la'ós oganizasaun ida, asosiasaun ida ba finalidade relijioza ka umanitáriu, maibé isin moris ida, komuñau ida maun-alin no feton sira-nian iha Jezús Kristu nia Isin, ne'ebé halo ita hotu sai ida. Esperimenta Kreda ho modu ida-ne'e no bele kona ho liman nia lialoos nia kbiit no nia domin mak motivu ksolok nian, iha tempu ida iha-ne'ebé ema hotu ko'alia kona-ba ninia deklíniu. Maibé ita haree oinsá Kreda moris loos ohin!

Iha fulan ikus sira-ne'e, ha'u sente katak ha'u-nia forsa menus ba beibeik bo ha'u husu Maromak ho insisténsia, iha orasaun, atu leno ha'u ho nia roman atu halo ha'u foti desizaun loos ida, la'ós ba ha'u-nia di'ak, maibé ba Kreda nia di'ak. Ha'u halo ain-hakat ida-ne'e ho konxiénsia tomak kona-ba ninia gravidade no mós inovasaun, maibé ho hakmatek kle'an espíritu nian. Hadomi Kreda signifika mós iha korajen atu halo hilin difisil, terus, hodi buka nafatin Kreda nia di'ak no la'ós an rasik nian.

Iha-ne'e, husik atu ha'u filafali dala ida tan ba 19 Abril 2005. Gravidade desizaun nian mai duni husi faktu katak husi momentu ne'ebá mai oin ha'u iha kompromisu nafatin no ba nafatin iha Na'i. Nafatin – sé mak asume ministériu petrinu la iha ona privasidade ida. Nia pertense nafatin no totalmente ba ema hotu, ba Kreda tomak. Nia moris, ita bele dehan, lakon tomak ninia dimensaun privada. Ha'u bele esperimenta, no sei esperimenta agora, katak ita simu fali moris rasik bainhira saran nia. Uluk ha'u dehan katak ema barak ne'ebé hadomi Na'i hadomi mós S. Pedro nia susesór no besik ba nia; atu Papa iha duni maun-alin no feton sira iha mundu tomak, no atu nia sente seguru iha hakohak komuñau nian; tanba nia la pertense ona ba nia an rasik, pertense ba ema hotu no ema hotu pertense ba nia.

Liafuan “nafatin” mak “ba nafain” mós – la iha ona buat ida fila fali ba privadu. Ha'u-nia desizaun atu renunsia ezersísiu ativu ministériu nian la kansela buat ne'e. Ha'u la filafali ba vida privada, ba vida ida viajen nian, enkontru nian, resesaun nian, konferénsia nian, nst. Ha'u la husik krús, maibé ha'u besik ba Na'i Krusifikadu ho modu foun. Ha'u la lori ona podér ofísiu nian ba governu Kreda nian, maibé iha servisu orasaun nian, ha'u bele dehan, hela iha resintu S. Pedro nian. S. Bento, ne'ebé ha'u lori nia naran nu'udar Papa, sai mai ha'u ezemplu boot iha buat ne'e. Nia hatudu mai ita dalan ba vida ida, ne'ebé ativa ka pasiva, pertense tomak ba Maromak nia obra.

Ha'u agradese imi hotu no ida-idak mós ba respeitu no komprensaun hodi simu ha'u iha desizaun importante ida-ne'e. Ha'u kontinua akompañia Kreda nia dalan ho orasaun no reflesaun, ho

dedikasaun ba Na'i no ba ninia Espoza ne'ebé ha'u buka atu moris to'o agora loron ba loron no ha'u hakarak moris tuir nafatin. Ha'u husu imi atu hanoin ha'u iha Maromak nia futar oin no, liuliu, atu harohan ba Kardeál sira, ne'ebé simu bolun ba knaar importante tebes, no ba Susesór foun Apostólu Pedro nian: Na'i akompañia nia ho roman no kbiit ninia Espíritu nian.

Ita husu Virjen Maria Maromak nia Inan no Kreda nia Inan nia interseasaun materna atu akompañia ita ida-idak no komunidadade ekleziál tomak; ba nia ita saran an, ho konfiansa kle'an.

Belun doben sira! Maromak gia nia kreda, tane nia nafatin no liuliu iha momentu difisil. Ita keta lakon vizaun fiar nian ida-ne'e, vizaun loos ida mesak ba Kreda nia dalan no mundu nian. Iha ita-nia fuan, iha imi ida-idak nia fuan, soi nafatin serteza ksolok nian katak Na'i iha ita-nia sorin, la husik ita, besik ba ita no simu ita ho nia domin. Obrigadu!

Benedictus PP XVI